

Die Roßmühl

Wie e großes Zirkuszelt,
Norr gedeckt mit Schilf un Rohr,
- So hat mr's mei Vaddt vrzählt -
Iss g'stann die Roßmühl hunnert Johr.

Genau wie bei eem Bännertanz
Iss g'hong an langi Stange
Der mächtich große Zahnradkranz,
Mit dr Drehachs fescht vrfange.

Un alles was zur Mühl hat g'heert,
War aus edlem feschte Holz;
Es hat sich vieli Johr bewährt
Un war des Millers Stolz.

Hölzern ware aach Zenn nun Nägl
Un de ganze Schrodekaschte,
Mit de Zappe un de Kegl
Hann se g'hall die greeschte Laschte.

Wie war des doch so wunnerscheen,
Dem steenerni Mühlrad zuzuschaue.,
Des Klappre heere un des Drehn,
Mit uffne un mit zune Aue.

Heit, do zieht's mich no de Mühl,
No dem Mühlsteen un de Rösser:
An sie, do denk ich jetzt so viel,
An die scheene Kinnerschlösser.

Die Johr vrgehn, die Hoor were licht,
Die Mühl hat uffg'heert sich zu drehn;
Schunn wart uff uns des groß Gericht.-
Die Zeit iss um, mir misse gehen.